

木  
訥  
齊  
文  
集

本齋文集卷之三

龍泉王毅剛叔先生著

同門諸

上高納麟大夫書

蓋聞有功不賞有罪不誅雖堯舜不能治天下方今盜賊  
擾攘之餘黎庶恐懼之日握兵權而任民牧者賢否不同  
苟不定其功罪而勸懲之則惡者以肆善者以怠盜賊何  
由而息黎庶何由而安乎夫鑑之明也妍媸不可遁衡之  
平也輕重不可欺苟非在我者如衡鑑之無私欲定人之  
功罪其亦難矣恭惟閣下忠誠格君仁愛及物敷歷中外  
有年於茲上爲九重之所眷注下爲四海之所瞻依當世

名卿無以其右者毅也山林樸學讀古人之書觀古人有  
澤被生民名垂後世者慨然想見其人於千載之上所謂  
我思古人實獲我心此之謂也况當世之大人君子德行  
政事足以配古人而獲我心如閣下者仰盛德而慕盛名  
實有日矣顧以氣體甚弱齒髮蚤衰不能千里裘糧厠下  
客之末以觀賢人之光謹遣學徒胡深齋書以獻竊惟好  
善惡惡激濁揚清方寸之間如衡如鑑足以定人之功罪  
而黜陟之捨閣下而誰望哉正宜明日張膽是是非非凡  
爲軍民之長者其人果有功也則斷然而拔擢之其人果  
有罪也則斷然而黜退之夫如是則其清濁無所混淆善

惡有所分別將見盜賊聞風而向化黎庶蒙恩而樂業非特可以復祖宗之盛時抑亦可以致唐虞之至治矣豈不休哉豈不休哉若夫有功有罪之人四方之遠雖不能周知目見而耳聞者請畧陳一二年秋冬間盜自浦城入寇弊邑之西鄙又有松溪入寇慶元逼弊邑之南鄙竭忠奮力調偏裨募義兵卒殄元寇餘孽保障淪東石抹萬戶之功也望風奔潰以致盜賊長驅而至土辱國家下誅生民張推官之罪有不可勝誅者幸遇而免恬不知恥猶以統兵自尊科取有司無所不至有司又復取之於民間則之間啣怨已極倘有數十人奮挺而起又將奔潰如前日

矣。豈不殆哉。區區愚慮。切以爲石抹萬戶人品甚高。威名素著。廉能兩盡。官吏畏而服之。寬猛並行。軍士敬而愛之。閣下當力薦諸朝。又當便宜委任。卽使之分閫處郡守。茲一方不惟數百萬蒼生得以奠枕無憂。其功業光輝。得以概見于世。天下識者莫不頌閣下知人之明矣。如張推官者。非特不可以握兵權。亦不可使之任民牧。閣下當首鯁直言。義形於色。劾而去之。是亦閣下與民除害。職分當爲之事也。然此二人者。特功之首罪之魁已耳。至於佐助石抹萬戶。平寇羽翼。張推官害民者。固有其人。未暇悉數。胡深等能爲閣下詳言之。毅安貧守賤。無求於世。彼之功罪。

已何與焉第以小人用則民受其殃君子進則民被其澤故思出其位犯非其分而不容緘默語曰唯仁者能好人能惡人毅雖不敏竊自附于古之仁人唯閣下其垂察焉

與蕭申之書

三石送別不覺半年敝邑士庶思念迨今嘗如一日我輩嚮往之誠抑又甚焉耳矣足下歸臨海堅臥不出誠得出處之正今爲左公一行信乎士爲知己者用也枯郡生靈非足下爲之保障安有今日然事勢大有可憂危者諸邑旱傷俱甚百姓遑遑以憂總戎者惟事徵求守郡者不能撫字辟如臥於枯薪之上使有一星之火豈不爲燎原之

炤哉山林寒賤不勝婆婦之憂惟大君子終惠之擇利害而興除之俾援十萬之蒼生臨危而卒獲安及物之功亦不少矣閣下每謂所蘊者大不得盡其設施古之賢人君子康時濟世亦隨其分限爲其可爲者而已矣岩穴之士拯一禽捄一蟻猶以爲積善之事而況全活斯人之性命者乎近詔書內一欵江南租稅減免二分田野細民懽欣鼓舞皆有大君如此豈忍負之之意此中富民頑冥令長罷弱使我聖天子徒有減免之仁心而窮百姓不沾減免之實惠前日歡忻鼓舞者轉而爲愁恨嘆息不聊其生若得足下告之上官戒飭郡邑嚴加奉行庶可乘時以快其

念此實固國本收人心第一義也惟閣下之留意焉斯民  
幸甚其次義兵坐食人日一二升有咎則聖風奔潰無事  
則徒爾耗蠹莫若卽日散之以完民力鄉兵已行團結自  
可守禦桑梓前日減免之事遵奉力行得士民之心則事  
無足慮者矣其他事宜短紙不盡俟得會見之日當詳論  
之每遇便郵上狀往往皆匆遽中旣乏精筆佳紙又或應  
世爲人言辭拙鄙字畫脫誤繩以倍筆牘爲札者不能無  
罪所恃大君子胸中曠達眼目高遠不觀以驪黃而覲以  
天機必無苛細之責故得無恐焉耳日來伏想海不揚波  
萬里寧謐鈞信勝常我雖屏居林下抱懷耿耿常有婆不



恤緯之憂私竊以爲方今文物渺然才足以有爲者多不能履正奉公德足以有守者又不長于赴公趨事率補架漏苟延歲月於乎悽矣生民何時而蒙至治之澤乎山深林密不能周知四方人才以耳目之所及言之德足以有守才足以有爲可以慰此心者惟足下一人而已願足下以今日之操履正大不干世吏自滿凡大節細行惟以古人自期修之於身者無毫髮之失施之事業舉此而措之耳豈不偉哉夫如是假令不用於時固窮守道不可爲大丈夫耳較之行妾婦之道而饗不義之榮者奚啻天淵之間耶相望千里萬萬惟蒼生自重

上俞廷心檢憲書

太上務立德其次務立功其次務立言古之君子所以傳世惟此三事而已曩聞得閣下廷對之策而讀之粹然學術之醇正燁然文字之光輝視世俗舉子之業豈可同日而語哉已而秉三史之直筆垂千古之雄文則閣下之立言可謂不朽也已今毫端推擇以閣下察守令於浙河之東所至之處明目張膽慨然以與民除害爲已任風節著於當代利澤被於生民閣下之立功可謂無愧也已夫閣下之所學如此閣下之所行如此非有德者其孰能之自今以往名位益隆責任益重不汲汲於進修益培其根

其可乎區區不佞願足下日用之間自強不息謹其微於  
念慮之萌察其著於事爲之應五德六經聖賢之道絕無  
一毫富貴之心使吾之立德誠如是也于以清立言之源  
正立功之本由是發之文章施之事業亦浩乎其無窮綽  
綽乎其有餘裕矣豈不盛哉深山野人食芹而美不知其  
愚敬用以獻惟閣下其恕之

與葉景淵書

去冬辱惠書今春附使上狀不審能徹几格否下問起居  
何似令人懷想如渴近傳從者還鄉未知果否忽吳中伯  
見訪山中始得其傳者不妄深以懌悅申伯云臺檄

致駸駸清要以愚見度之當世人物眇然急於用賢以吾  
景淵才幹風節必有豸冠之擢方今盜賊蜂起天下騷然  
原其所自皆其居風紀者不能分別清濁爲守宰者不能  
撫字黎元習以成風知有利欲不復知有名節以理律之  
從政者皆無異於盜賊其間卓然樹立能自拔於流俗者  
指不可多屈如是欲盜賊之息其可得耶惟足下當慨然  
以澄清天下爲己任修德以正身爲本報國以薦賢爲先  
使在我者大公至正無毫髮之私知賢必舉無嫌疑之避  
倘海內無在位之小人無在野之君子而盜不息民不安  
吾不信也一得之愚不知忌諱以足下平生久要愛助之

心不能自已故敢布聞他日功業有成爲國朝之名卿爲百世之人物豈不偉哉超然高識以僕之相期於遠者大者必不以爲迂也

上思寧普元帥書

毅聞古之善相天下者進賢退不肖而已賢者必進之不肖者必退之夫如是則賢者之道得以行不肖者之欲不得逞上以格君下以澤民相天下之能事畢矣書曰野無遺賢萬邦咸寧易曰小人勿用必亂邦也聖人之意豈不深切著明也哉閣下昔任風紀今專方面浙河以東其地方數千里其民以數百萬計此數百萬之生靈其休戚實

係於閣下承平之世大有之年尙當求賢以自輔况當賊盜擾攘之際黎庶饑饉之時乎然則訪求賢才舉而用之實救時第一義也前有海上副萬戶石抹武德者其操心也正其務學也博其德足以成已其才足以濟時抱負偉烈當世之士鮮有能及之者去年夏秋江閩群寇漸迫浙邦處州之人日夜思懼部使者擢石抹君託以討賊其下車之至龍泉也盜方掠邑之西鄙民有倚賴奮而擊之賊衆震懼遂遁而去厥後慶元守禦不得其人縣治陷沒石抹君調發將士召募義兵克而復之易如反掌賊勢猖獗之日合松溪政和浦城慶元四縣克豎進攻龍泉長驅而

至民心岌岌微石抹君浙東諸邦已胥爲盜之淵藪矣枯  
蒼千里之民婦人穉子額手相加僉曰活我輩者石抹公  
也其平寇保民之功踰年於茲矣當路未有舉揚而拔擢  
者獨閣下好賢盛心形之薦章側耳而聽之又半年於茲  
矣未聞石抹公之見用也豈閣下耶以塞責而薦之不力  
耶抑當路者付之藐然不以閣下之心爲心耶若臧文仲  
知柳下惠之賢而不與立孔子責之公叔文子之臣大夫  
侯與文子同升諸公孔子賢之閣下讀聖人之書於斯二  
者必知所去取矣宋趙普爲相嘗薦用一人太祖怒取其  
奏疏而棄之普拾其奏疏明日復進仍擲棄之又明日復

以奏疏進太祖愈怒碎其奏疏而擲之普揮笏腰間碎拾  
碎紙歸補綴之明日又進太祖遂用其人卒能勝任此事  
表表在人耳目閣下豈不知之誠使閣下之薦石抹萬戶  
也如趙普之爲有弗薦薦之勿用弗已也明天子賢宰相  
勵精圖治宵旰求賢必允所舉閣下之才之德當以皐陶  
稷契自任舉善薦賢顧反出趙普之下甚爲閣下惜之浙  
水東七路處最僻遠民困且饑易於興變撫而安之存乎  
其人閣下旣知石抹公之賢當力薦諸朝任以分間統制  
軍民許其便宜行事必有處之之方盜不息民不安吾不  
信也此特以進賢言之耳若夫退不肖者請畧陳之荆襄



遺孽非有智謀之士驍勇之人也蟻聚之昨鳥合之衆而已其于官軍對壘之時使有羸弱數十百人守之彼亦疑懼前却而不敢進統兵非人望風奔潰遂致失守荼毒生靈固有任其咎者其事雖經赦宥其人尙足用乎顧乃仍渥兵權肆無忌憚困民力失民心頤指有司作威作福區區慮恐其未足以弭盜適足爲大盜之招未足以安民適足爲斯民之蠹其爲害豈淺哉閣下以勲舊閭閻之家居方伯連率之職數百萬之蒼生休戚之所係所轄屬吏苟不旌別淑慝而黜陟之何以答國家之委任副黎庶之屬望乎是道也豈但足以藩宣一道而已哉異日居廟堂

之高秉鈞衡之重使天下之賢者無不進惡者無不退於  
以堯舜其君堯舜其民可以企足而俟矣山林寒賤獲與  
草木群生咸被堯舜之澤則受賜大矣惟閣下其念之

與鄭教授書

毅仰恃斯文之好僭白衣悃青田賊人潘賢三等攻陷縣  
治官兵潰散毅蒙分閫委令團結鄉兵守護縣治幸賴師  
友之間行義浮於州里召集鄉兵雲合響應已收克復之  
功惜乎錢糧全乏士卒疲困枵腹嗷嗷無以爲善後之策  
伏惟先生抱經濟之學存愛物之心特賜仁人之言白之  
帥閫黃堂頒降錢糧犒賞士卒使之各復其業更特遴選

賢能之才撫治殘破之邑息盜安民之無他恐此惟先生其留意焉幸甚

上黑元帥書

某山林寒賤無求於世惟欲講明道義使人同歸於善而已以此與時人不合鄉人不善者深疾之動欲誣害昔司馬溫公天下之正人當時小人目爲夷黨朱文公萬世之正學當時小人目爲僞學在前賢尙不免此况學行未足以仰望古人之萬一則爲小人之毀短亦何足怪哉但當力於進修日月操履俯仰天人求無愧怍而已追他愠乎今歲春夏之交邑長謬政枉陷善人無厭亦將及某荷蒙

大人君子惻然憐之特遣使招入幕維持而調護之免致橫遭中傷仁者之能愛人至於如此某適在病中因不能獲上謁轅門圭竇之士豈敢輒行白通於方面貴人蓋揆分不然感佩恩德終身不忘迨欲裁書以謝顧爲華門區區部下恐失禮而缺典也六月間賊陷敝邑學者章三益於賊未至之前一日蒙鈞批團結鄉兵守護縣治賊至之明日三益以某粗有力蒙鄉人信服令爲表倡首舉義兵於是學者季彥文慨然奮命與章三益相爲表裏衆心翕然雲合響應殆至萬人數日之間殺退賊衆克復縣治此皆三益彥文率領之功與衆義士鄉兵馳驅之力於某奚

與焉所有賞勞銀碗緞疋錢鈔簿用納還區區之心但欲  
乞閣下遴選賢能之才撫治殘破之邑俾穀得與宗族鄉  
黨而聚友生之樂同爲太平之民於穀足矣奚功賞之望  
焉僭敢獻書以聞惟高明其垂察焉干冒鈞嚴下情不勝  
戰栗之至

與胡仲淵季彌章書

至正十三年  
十二月寄

仲淵一別將兩年彌章一去幾一載雖同淞江之東隱然  
弱水之隔時事多虞不知四方何時俱寧二賢何時全歸  
臨書不覺爲之悵然也茲因三益長子去台城省乃翁已  
作石抹蕭君書仗此老作大檀越爲穀親書樓更仗二賢

言之大叅公亦爲作檀越可乎第恐大叅不讀書非其所  
喜倘愛屋及烏以仲淵之故時蒙作成捐數月之俸亦足  
爲士林美談蓋鄉里朋友間貧者愛莫能助富者又以均  
役減分勸票三事助憎非假王公大人之力則無以成之  
邵康節之安樂窩朱晦菴之武夷精舍亦皆達官貴人作  
成之毅不過小規模惟二賢同三益爲幹緣不勝幸甚草  
艸不具

寄危太朴書

自識執事以來敬慕德學每對士友喜談樂道之不覺形  
於色豈非好賢之心自不能已而然耶前書欲執事退處

山林俾吾黨得相從於寂寞之濱顧亦有足樂者然不尊不信又不若官於朝之可淑諸人也近執事有授經之命穀聞之深爲喜念欲拜書以賀道遠無由但誘掖薰陶使我國人少知義利之辨庶有補於世道是亦執事發揮所學一二之時也今執事駉駉顯融道德節義之士見亦罕矣所友非富貴之人則文學之士日與之處一或罔念則變於風俗矣可不懼哉執事見道明固萬無此失然憂危治明之慮責善輔仁之忠更願抗志高明超乎萬物之上自強不息粹然一動以天則以之出仕以之歸隴將無往而非進德之地矣執事每謂穀不相知爲是喋喋古人所

學是終身事朋友之職固當然耳僭越之罪惟執事其恕  
之前書以心學于執事乎質者萬乞批教向蒙許惠南歸  
序引幸賜秉筆并有以振德之方不勝至願相去道里五  
千無緣承教臨書惘然惟爲時自重不宜

與章三益書

卽日初夏清和赤城山水之勝爲東浙佳處又得賢主人  
爲之依歸聞見日新智識日長足爲吾道深賀聞帥君宣  
命特至甚可上爲聖朝得人賀下爲蒼生有所依賴賀  
也竊意況如常諸所欲言存道能詳之此不縷縷愚意欲  
創書樓數間已拜帥君書仗此公作大檀越更仗足下幹



緣期在必濟他日願足下成名還鄉當相與登樓以覽觀  
山水展卷以詠歌詩書庶以樂先王之道而志其美矣臨  
楮至禱惟高明圖之不具

寄黃晉卿學士書

前年秋辭別後冬間嘗僭躡上狀托林以道轉達拜起居  
不審徹尊覽否繼而以道以高文寄朝夕誦咏不勝愧感  
區區無似以木訥名其書室辱先生賜之起啟廼加多進  
學而至於仁敢不實下工夫以無忌先生之德政圖拜謝  
以書而從者北上鄉邦學者失所依歸雖不能無恨然老  
成典型可爲朝廷之重且使四方士大夫考德問業有所

矜式此殆天之相斯文也一何幸哉南北遼遠無由侍教  
偵伺南歸當拜於雙溪之上也

代章三益上黑的元帥書

六月十九日蒙路司吏吳忠齋鈞批到家二十日青田賊  
人潘賢三等攻陷縣治蒙關請鄉先生王剛叔關會義士  
季彥文等召集義兵西南兩鄉共計八千餘人二十二日  
賊人分陣出哨西南兩鄉先鋒義勇奮不顧身所殺賊人  
不計其數二十三日官兵大捷二十七日克復縣治惜乎  
錢糧全乏士卒饑疲其長官達魯花赤齋印遠遁不知去  
向司吏徐達正等亦行奔竄惟林縣尹承事雖用克復然

獨員署事全無規畫錢糧之方義兵屯駐縣郭幾萬餘人  
嗷嗷度日今已沙汰見存四千餘人亦無可供給况溢一  
介書生素無謀畧但以師友之間行著鄉里故能仗義二  
呼應者雲集以此幸不辱方面相使之命然堂上慈親老  
病前口力辭大叅甫遂歸田省侍之請當此危急之秋仰  
賴鈞批事切就委但宜速撥錢糧犒賞士卒各復其業仍  
遴選才幹威斷官員守護縣邑庶使盜賊有所懼而悔過  
黎庶有所依而樂業使其得遂歸田奉親之願實拜陶成  
之賜不勝幸甚

答鮑自明書

承書疊疊千百言讀之累日竦然增敬然問以立身進學之方當就正於有道君子毅何人斯足以當此自揣愚陋無能益於高明不敢奉答條經半載然厚意不可以虛辱請舉節目之大者以復於左右細觀來教首言學業不進何以自立于天地間者言有以自立雖貧且賤以終其身無恨也足下此言古人爲己之學也逃空谷而聞足音不佞深爲喜孔子曰可與共學未可與適道可與適道未可與立自立未易言也若何以用其力耶孔子不曰立於禮乎伯魚過庭所聞魯論終篇所記聖人初無異辭孟子立天下之正位文公先生亦以禮釋之顏淵問仁章傳心法

切要之言也曰克己復禮曰非禮勿視聽言動孔子所以教顏子所以學不過如此由是觀之以禮律身一循天則篤志固執確乎不變其斯以爲立之方也與雖然苟無其本規規制之於外亦憂憂乎其難哉必也提撕警覺常存此心使清明在躬志氣如神則動容周旋自中規矩表裏挾持外物不能動亂吾之所爲者安矣中庸所爲立天下之大本孟子所爲先立乎其大者此之謂也不特此也六經語孟與近世濂洛關閩諸君子之書千言萬語莫非吾立身之方取其醇而舍其疵法其善而戒其偏諸史百家亦莫非吾立身之助爲己之功果能如此學業之進詎可

量哉戴天履地夫何歎也哉富貴以貧賤於我又何與哉杜  
門山中飯蔬飲水開卷蕭然與望賢對可以求師友於千  
載之上矣僕之愚豈足爲矜式乎嗟夫俗學汨汨志小氣  
弱惟競虛文不尙實踐是以利欲之塗出則顯朴亦可悲  
矣超然拔俗卓然樹立求無愧于古人毅之所存蓋如此  
惟足下實用功而相與勉焉吾道幸甚

代章三益與張照磨書

一介迂疎素無經濟之學過蒙分閫鈞批委用人才溢圍  
結鄉兵守護縣治守土不得其人賊至望風奔潰生靈塗  
炭痛不忍言某不及量責重弗敢負帥君委用召集義兵

殺退賊徒縣治已行克復然兵雖足而食不足萬口嗷嗷  
不勝饑餒已去十八之五六猶未有供給之計往往遠遁  
福建平民之家正當青黃交接之際自己尚無餽粥之資  
又何以爲軍旅之餉况調用先鋒皆許以一人給賞十有  
五錠勇悍之夫冒死向前利于得賞已喜成功豈容失信  
特此拜仗望閣下以生民爲念若何規畫如無糧供給無  
錢犒賞實爲狼狽關係非輕况監院達魯花赤齋印遠遁  
諸縣吏亦奔竄惟林縣尹雖用克復殊無調度萬望請於  
方面謀之郡將必早撥錢糧供給犒賞選賢能以撫治使  
某早遂歸田奉親之願實拜大德不淺臨書至禱瞻晤末

涯萬萬惟時自重不備

答章三益書

文旆遠歸以慰慈幃倚門之望甚喜甚喜太平詩翁至袖  
出手筆具審起居勝常尤以慰喜來諭云云備悉雅意又  
以見長官好賢之心豈不感激聞之大叅公之移鎮鄱陽  
也以監邑爲能吏羅而致之以自助拔茅連茹甚盛舉也  
吾思監邑當仰體大叅獎拔笑意痛念國家多難群盜蟄  
興省檄一至馳驅上道慷慨激烈身先士卒以雪君父之  
恥以盡臣子之節由是建偉績成大名豈不眞丈夫哉不  
知出此而乃臨事避難據邑自守結羣小之黨拒上官之



命是不有君父也是不爲臣子也其設施果安在耶且此風漸不可長爲邑宰者可以此而待方面咄咄愚氓不可以待邑宰乎然恐亦非監邑之本心尚惟有以勉之

木訥齋文集卷之四

龍泉王毅剛叔先生著

同門諸生校正

張思永字說

學者張拯字彥紳毅謂之曰生之名若字其義何居拯無以對一日告余曰已請於家君更名思永願先生更其字因以勗之思永之幸也大矣余語之曰書不云乎慎厥身修思永夫思之永則非淺近之謀可謂志於遠者大者已志於遠者大者不在乎他在乎身之修而已矣故曰自天子以至於庶人壹是皆以修身爲本人能修其身可以爲士可以爲賢可以爲聖可以與天地參願所修何如耳思

永勉之信能修其身賢於一鄉之人則可以爲一鄉之士  
矣信能修其身賢於一國之人則可以爲一國之士矣信  
能修其身賢於天下之人則可以爲天下之士矣信能修  
其身無愧於古人可傳於後世則可以爲百世之士矣由  
是而充之爲聖賢處策勲參天地而無外亦在我而已矣  
請以允修爲字惟思永其勉之反躬允蹈力於自修非特  
足以起予而副所望抑亦足以成已而不自欺矣若夫修  
之方聖賢千言萬語不啻詳矣允修其學問思辯篤行  
以終之庶不辱予之字也夫

王夢麟存存齋銘

俗學鄙儒枝葉日繁一心放逸千里馳奔誠能鑒茲培養  
本根放心纔反德性乃尊念念不舍是爲存存萬善從出  
道義之門心常不昧欲豈能昏瑩若寒冰旭如朝曦我明  
斯理不工於言汝其識之永矢勿諉大本旣立講習討論  
眞見洞徹實踐益敦上師周孔下友淵騫庶幾無愧父乾  
母坤

孝箴

夫孝者人道之本也父天母地而人賴以生焉是以未有  
無父母而生於人亦未有無天地而生於物其盡孝道者  
豈有他哉報本而已矣子職而已矣其有不孝者果人也

耶非人也耶且非人者猶有取焉羔羊之跪乳慈烏之反哺豺獺之報本鱗魚之類育昭昭可鑒者也人道可不重與經云夫孝天之經也地之義也民之行也孝有三大孝尊親其次弗辱其下能養經云五刑之屬三千而罪莫大於不孝誠知此義其可不孝也哉

### 悌箴

夫悌者事長之首務也自吾兄吾長此吾所當敬者也此所爲悌也且鴻鴈來賓不臘等而飛立荆花之茂遽憔悴於三分動植尚爾而況於人乎經云徐行後長者謂之悌疾行先長者謂之不悌徐疾後先悌不悌之小者且聖人

開示後學孝悌而已矣聖賢與不之悌大可知矣誠知此義其可不悌也哉

### 廉箴

夫廉者取物之權度也。止俗不知廉之爲廉可憫也。歟。或不知廉而妄取固不待言而不知其下矣。或謂一無所取之謂廉是陳仲子之流也。孟子曰雖然仲子惡能廉以其不知而不能之也。廉者稜角辯也。致於取舍可否岐然而途初無紊雜在我明之而已矣。不廉者大而殺越人於貨細而吏目竊一錢雖有細大之差總之皆天地之辜人也。誠知此義其可不廉也哉。

恥箴

夫恥者立身之端潔制行之清高與薄俗人居若將浼焉  
固爲興立之心人而知恥與夫姦盜賭博之非流連荒亡  
之行一言不道一術非正皆不爲故孟子曰恥之於人大  
矣爲機變之巧者無所用恥焉不恥不若人何若人有誠  
知此義其可無恥也哉

跋米元章帖

唐張長史書宋米元章跋張書已失米跋尙存余生沈宗  
海購得之元章書法妙天下垂三百餘年矣宗海其寶之  
安知夜夜不有虹貫月也耶

跋陳希夷樂道圖後

太極圖先天圖其淵源所自或者以爲皆希夷之所出也  
果如是則希夷所樂之道非直爲老莊氏之學而已也今  
華岳巉絕之處不識有圖南倫否乎誠有之吾當作樵夫  
拜而受教焉至正癸巳南至日瑯琊王毅龍泉槎陽精舍  
敬書

跋李大明閒居集後

國朝幅員之廣超漢唐而軼商周草木羣生涵煦聖澤此  
吾友李君大明閒居之作所以爲治世之音而歌詠太平  
者也將與康衢擊壤之謠相映於千載之上何其盛也三



數年來世故多虞可爲太息不識大明憂時之心亦嘗形之于言否乎敬識諸詩卷之末申以問之

跋西溪千字文後

智永手寫千字文凡數百本西溪書千字文僅如蠅頭吁亦勤矣習小技者尙爾學大道者可懈惰耶吾友當深省於斯矣

木訥齋文集卷之四

木訥齋文集卷之五

龍泉王毅剛叔先生著

同門諸生校正

與鮑子木

微恙亦不惡詩應枕上看人稀白日靜花謝綠陰寒華屋  
藏深巷危樓俯遠湍主人不競草木總平安

其二

藩籬一剖破詎須更隄防瑣瑣世間事焉能動中腸富貴  
百年短道德千古長願君同勉勵本心日月光

其三

廢典觀史傳冷暖閱人情蚤悟蟻穴夢肯爭蝸角名座得

能詩客家有讀書聲幽居謝俗侶庭前春草生

其四

多病道心長閒栽石上松斯年盡陰雨好景幾光風春事  
彈指頃人生炊黍中劉郎識丹訣好與講叅同

其五

渠渠處大厦高明心眼開無事時對卷有客輒傾盃借問  
榛有用何如樗不材萬事從吾好英雄安在哉

宿深省

講學高樓上挾朋來友生曄晤夜更闌月照窻前明曉起  
凭欄望杳杳川原平是時仲春半花卉方敷榮熙熙氣候

和湛湛天宇清田中蛙正鬧草際虫更鳴萬物各得所吾  
所樂性情童子勸作詩對景舒心局吾與二三子爐薰對  
遺經豈無沂上人詠歸春服成獨憐寰區內連年久不寧  
近而我傍邑豺虎尙縱橫黎元一何苦四野多哭聲擄掠  
失妻孥鋒鏑傷父兄想其對明月淚下如河傾願天早平  
定四海息戰爭盜賊本良民投戈各歸耕萬國共明月壽  
域開八紘我乃安猷畝道義得考評常如對斯景方寸同  
鑒衡

贈蕭申之

白髻映烏紗相過話歲華炊梁煩剪韭罷酒更呼茶深夜

簾前雨寒梅窓外花劇談更秉燭妙契在君家

書樓

危樓高倚五雲邊會聚羣英究簡編理探仲尼心上事燈  
吹太乙杖頭烟聲音朗朗驚闐闐光焰騰騰逼斗躔此處  
廣寒宮咫尺分明有路去朝天

與車伯任

潦倒嗟予髩已星見君猶有古儀形異鄉客况多清冷薄  
俗人心轉晦冥齊魯南來淮樹碧甌閩東下海山青飄蓬  
歲月成何事歸向窓前照夜螢

其二

閉戶休教俗士通二三良友儼儀容滿庭草色經秋綠一  
炷蘭膏永夜紅筆下看君雲鬢鬢邊老我雪濛濛讀書  
本不要人爵肯向山林嘆未逢

挽王克齋

翹首西方烟霧深吁嗟霜木減儒林濟時未睹袖中策  
遜世先遊物外心槐蔭滿庭人不見梅花開雪子能吟共旌  
孝道些招隱扇起淳風無古今

送蕭德彰歸武昌

細雨青燈此夜同征鞍明發枯山中文淵老去心猶壯元  
亮歸來酒不空彭蠡波光涵鴈影洞庭木葉動秋風武昌

西望三千里何日重遊浙水東

其二

桂子吹香欲暮秋西風華髮鬢颼颼官情爭似山家好歸  
興不知途路修茆店月斜殘夢斷楚江日落片帆收還家  
親友相懽會醉把黃花說舊遊

其三

蕭然官滿賦歸興行李秋風半擔書白露青原無限好何  
如偏愛武昌魚

題礪谿圖

人間興廢柰伊何千古傷心麥秀歌惟問礪溪垂釣叟暮

年何苦執干戈

題釣臺圖

萬乘謙謙下匹夫  
激成名節重東都  
富春山下桐江水  
千古高風入畫圖

餞留德嘉

忠齋諸孫富儒術  
蜿蜒清淑鍾爛柯  
帥檄遴遴教吾邑  
矩矱標致莊以和  
劍川前朝素多士  
項背相望登巍科  
文章鉅公亦間出  
水心筆力挽江河  
士風邇年一以變  
昔號淳厚今澆訛  
青衿城闕日排闥  
黌序具可施爵羅  
先生樂道耐岑寂  
古井湛碧心不波  
遺經獨抱無所受  
虛齋捫腹高



吟哦公居臯席近三稔賤子兩載溫江淹我歸城東耶屏  
處與俗異趣誰肯過師而求友世所罕時時不鄙來行窩  
一盃茗罷無雜語經術行誼交琢磨古來新知樂不樂公  
歸使我愁還多槎溪清瀨鳴漉漉層橋疊巘喬峩峩茫然  
山水隔千里未知後會時維何

次鮑自明游佛山

抗顏非我願屏踪希綺園深嗟古道遠人僞日已繁見利  
鮮聞義棄寒競趨喧聞君信殊俗苦節咬菜根自明篤文  
行舊醴喜猶存張生克節操劬書稱名門九月天氣爽從  
我遊南原山寒日色薄茂林烟光昏排雲逐野鶴攀木隨

孤猿蒼崖露仁體碧澗涵智源三子知好德玩索當耐煩  
汲汲分陰惜歲月如川齊人生非道義莫異犬與豚流水  
本清徹汨以泥則渾善性皆有之勿謂難與論愚者可使  
賢薄夫可使敦元公最先覺繼統程弟是後學抑何幸受  
此罔極恩諸生各努力道心永勿誼沒齒事鑽仰力久無  
高堅

題蘇軾所書扁濟川橋留槎閣

簾幕天香桂子秋白沙翠竹護中洲平分風月雙溪水高  
摘星辰百尺樓鑄劍空懷今古跡留槎不碍去來舟長虹  
可接天河路我欲梯雲汗漫遊

次蕭申之

名節昭昭爛日星重來舊鎮髯猶青論才自可希三傑致  
用端能契五經每與諸生分座席了無俗客到堦庭天生  
豪俊爲時用未許投閒自晦冥

其二

年將五十髣星星永夜寒燈照汗青莊子空談堅白論楊  
雄漫艸太元經死心一榻書充棟生意無邊草滿庭每嘆  
巢由空矯俗教踰定分嗟沉冥

跋宋宣和殿書萬壽宮扁

萬乘金書扁大門地無寒暑景長春五明宮裡光無極三

境天中道合眞雲護青山連碧落溪涵綠水隔紅塵何如  
了却浮生事來向清幽著此身

次練君舉

我住槎西君邑城我東君又向西行十年不見頭俱白萬  
事惟憂道未成覆雨翻雲何日了吟風弄月有餘情令人  
太息人間事惟有青山不世情

跋吳道士煉丹處

少微高士舊知名無復前朝寵異榮丹井尚餘龍虎氣青  
山猶帶鳳凰形豈無二士尋源入終有神仙按節行十二  
樓臺烟霧杳天風吹動紫鸞笙

訪樾衣仙境

肩輿來訪樾衣仙，乞與還丹想我憐。  
自念年華行八十，還觀桃熟歲三千。  
樹林蔭映環區宇，泉石幽奇鎖洞天。  
浩恨無家可歸隱，愿言結屋白雲邊。

跋潘景賢順寧巷

孝心本從仁心出，孝行脩時仁道成。  
請君細把西銘讀，仁孝兩全方順寧。

詩餘

送林縣尹

臨江軒

治邑堪嗟人物少，誰教狼狽收羣羊。  
我公爲政尚循良，真情

無表暴雅望自馨香

兩載溫然猶一日視民懇惻如傷從今遷擢愈輝光仁心  
昌後裔丹桂五枝芳

贈胡深 鷓鴣天

耿耿胸中一寸丹生平清節雪霜寒閩郵寇盜初戡定浙  
壤忻聞奏凱還

萬世事可長嘆中原見說未全安君才不在淮陰下爲報  
君王早築壇

謝蕭申之 臨江軒

世襲功門優將畧六經百氏兼該信知文武有全才等閑

平逆暨父聽凱歌回

捺履冰心秋月白誠心公道宏開牛刀暫爲割雞來拂衣  
行謝事閉戶臥天台

贈王府判

滿庭芳

黎庶愴惶風塵亂湧濟時須仗豪英堪憐烽燧逼山城帥  
閫掄才付托公纔到克豎竄驚牛頭嶺長驅大捷千古播  
高名

戎兵守禦居民雜處雞犬俱寧于今喜隣封四境清不欲  
紀明公偉勳麒麟閣自有丹青時唯見口碑誦德途巷起  
歌聲

贈葉深

西江月

軍法堅持三尺劍將才足長干夫指麾談笑勦賊颺盡道  
將軍威武功業當銘彝鼎聲名必達京都一方無事賴安  
居但願長留棧渚



木訥齋文集卷之五

木訥齋文集附錄

家傳

宋

濂

人金華

王先生毅字剛叔其先自瑯琊徙居處之龍泉至先生傳  
十有三世爲農初西隣有王氏子事身奉神甚謹常斲木  
爲拜具當額處成窪母某氏有妊夢神來而誕在赤子時  
頗異遇浴及手足露皆怖而啼姑懷之則止頭患瘡母惡  
其臭卷木葉掩鼻當乳時勿之視瘡疾大作身如火熱掀  
榻畔懸繩代褊無風繩自搖及能言講陳入浴時如蹈大  
海茫無津涯風入手足間痛若刀割姑衣有繢能覆之乃  
安木葉氣烈不可近熱勿能禁神出戲繩上下視一小兒

僵臥心知其爲已也熱退乃復還人咸奇之六歲知好學  
家單不能致每借書于市中一誦輒能記憶稍長所嗜益  
深父機命牧牛掛書牛角而讀之隨牛東西行日入忘歸  
復使視春溪瀆挾冊坐輻車側米成粉不悟父怒逐之出  
叔父與明憐之爲之代償其米且令聚徒教授束修之上  
悉以購書積至萬餘卷精思疾讀惟恐其盡夜深燈屢灺  
猶聞其吟諷聲或達旦不寐因觀周子太極圖說嘆曰此  
非聖賢之階梯也人心與上堪下輿同大局于一藝可乎  
會上饒鄭君原善來爲郡錄事先生往質所疑鄭君甚器  
重之已而往謁許文懿公謙于金華山中公爲詳陳理一

分殊之旨先生豁然如夢斯覺居久之循涯泗沂黃河而  
親泰山鳧繹之雄徘徊闕里悵然有千載之思遂北至京  
師薦紳先生若黃文獻公潛揭文安公侯斯翰林學士承  
旨歐陽公宏叅議中書危公素爭相引重聲譽翕然至有  
薦爲檢討經筵編修翰林者先生皆引分固辭俄而南還  
鄉里益以躬行實踐爲教其發明本心之學至利欲沉冥  
處多有感泣者一邑化之大山長谷愚夫愚婦皆知畏慕  
革心從善縣饑先生告令長曰民餓且死大夫得奠枕而  
安乎卽語以勸分之法閭右之家計口賦其食餘粟盡乞  
借平民全活者以萬數父老見先生拜且泣曰我等皆白

骨也而先生肉之耳至正中荆襄兵起掠七閩直犯縣南  
鄙先生盡八策贊將軍石抹宜孫破之仍不遠千里遣其  
徒上書行御史臺以明將軍之功未幾盜發青田揚言來  
攻縣長吏台寶忽丁遁盜遂深入焚官舍汚人婦女擄擄  
至雞犬先生召門人章濫季汶等謂曰吾豈忍以良民界  
豺兕乎濫等曰惟先生命乃部勒鄉民爲兵逐殺群盜太  
府錄功賚之以金帛先生曰得選賢令以撫創殘民則殺  
拜賜侈矣謝不受俄部使者下令正丁罪下憲集季溪惡  
少年據險阻以方命首害先生於家縣人無少長皆痛憤  
灑泣以復仇爲事弟子胡深方叅軍事邵陽急馳歸與同

門友告方伯連率帥師剪夷之越二年始平乃葬先生於  
蓋竹之西山別建祠而尸祝之先生爲學深見天地萬物  
一體之意視衆之顛隤如已之病苟力可救雖鐵鉞鼎鑊  
在前後有不暇恤至於禽魚之微不得其所亦爲蹙額弗  
寧思遂其生然疾惡如仇遇有賊民吏切齒扼腕流涕太  
息必疏其奸狀鋤而去之豪民制鉅量以入粟亦叱使減  
去以合常度小人不便爲惡時欲加害賴上官察之獲免  
生平雖不食君祿其尊君庇民之念夢寐不忘武威俞闕  
公持節浙水東廉其詳謂其卓行不讓古人性不溺於文  
辭嘗嘆曰今之世何能文者如牛毛而植德者若麟角盍

亦知輕重乎人有求者揮毫立就亦淵然有奇氣可謂自幼不茹葷肉雖強之食終弗能下咽閒居飲客欵容澄坐多至夜中或倦極目瞑鼻息雷鳴坐客未寢者譚辯遙起晨興先生各能記其言而折衷之其神全而不亂如此歿時年五十有二娶葉氏婁氏皆無子以兄之子彥珣爲嗣扁書室曰木訥齋人因請稱爲木訥齋先生云

太史氏曰昔者山陽殷子通以儒術教授里中人薰爲善良者衆及鄰境寇作子通率弟子起兵殲之長吏惡攘其功使人殺子通門人毛術手刃殺者梟首以甘心焉君子多義其事與先生絕類雖然先生以明體達用

之學保障鄉邑使數十萬蒼生去危卽安非子通比也  
固不幸遇難而死諸生爲師復仇兵屯二年勿解卒屍  
鼠輩于市功比術爲尤難祠宇之建不建又在不論由  
是而言其義不亦爲益多歟嗚呼先生道德之化蓋亦  
入人深矣

墓誌銘

胡翰

金華人

龍泉王先生旣歿於難後三年其弟子胡深以前進士盛  
景年所撰次先生之行來乞銘嗚呼翰其能銘先生乎先  
生諱毅字剛叔其先晉丞相之所出也後有自越之山陰  
來徙者至剛叔遂世居龍泉之西寧鄉曾祖某祖某考機



皆勿仕業田自給剛叔生而有異六歲讀書一過成誦十  
餘歲能爲詩文勤苦嗜學父母嘗命之牧晨旦驅牛出取  
經書坐石上讀之牛自飲飼夕還讀猶不倦又嘗命負米  
往春因讀書確傍久而米敗不覺也懼其親怒不敢歸鄉  
人憐其志易以善米與之俱歸語其家曰若子非田舍兒  
也宜令勉學爲假館邑中以學焉洎長遂通經史百家之  
言一日讀周子書有省嘆曰無極之真二五之精妙合而  
凝人之得於天而爲聖爲賢者固如此慨然以斯道自任  
遊學四方西適吳南逾楚北遊齊魯之間謁孔子闕里弔  
其遺跡覽山川之勝樂其風土之厚人民質而有禮意欲

居之不果退處山林中野服蔬食終日危坐汨如也弟子  
受業隨其器而教之令致力於孟子存心養性之言所至  
通都大邑士爭延頸願交客遊京師復過齊魯抵于幽燕  
一瞻皇居之北闕壯麗人物之繁文翬翔縉紳士大夫間  
以布衣有聲上方開經筵訪求名儒大臣遂欲舉以聞剛  
叔勿願卽棄去過彭城顧謂弟子胡深曰鄭之虎牢宋之  
彭城皆必爭之地子其識之禍亂將興此必不免剛叔旣  
歸未數歲而中原起事矣東南騷動閩地山谷之間往往  
烏合爲寇龍泉與閩接壤遂犯龍泉剛叔以謀贊萬戶石  
抹潛師破其衆未幾青田寇至親率弟子致討復其邑治

又未幾貴溪寇起邑中剛叔再議舉兵衆寡不敵而被執  
顏色自若從容遇害矣享年五十有二 至正十四年  
甲午十一月十一也娶葉氏婁氏皆無子以兄之子彥珣  
爲後門人以明年十月十二辰時葬先生于西寧鄉蓋竹  
立祠歲時享祀人人思慕其教言必稱先師云剛叔貌甚  
癯口訥于言平居推已待物循循然鄉里皆知敬畏若一  
聞不義之事輒怒形于色若將免焉然博聞多識素性適  
情雖少時襁褓間歷歷能言之爲文章不留稿門人收拾  
於散亂磨滅之餘得詩文若干卷每謂人曰人患德不立  
不患言之不立也古之立言者幾千萬人傳世能幾何

哉故其學不尚浮華篤於自信當世儒者如文懿公許益之翰林承旨歐陽元經筵侍講學士黃晉卿兼訪僉事俞廷心國子博士危太朴皆折節相下嘗自號木訥齋黃公爲文記之翰與先生學爲同門交遊三十年其義甚厚今先生墓有宿草矣烏可不爲之銘銘曰 天啟喪亂衣冠而墜惟烈丈夫勿變其志在古所難今斯豈易嗚呼先生從容就義亂有所不避死有所不畏彼何所恃曰吾惟斯道之履

祠堂記

王 禎  
金華人

君子之制行不以出處爲間而能忘己以爲人其可謂志

於仁也已夫天地萬物舉吾一體仁者之心也故凡人之  
顛連而無告者苟吾力足以賑之則務以推吾志之所欲  
而所居之地並不暇計古之人蓋有處畎畝之中而以天  
下自任一夫一婦不獲其所若已推而納之溝中者非其  
志于仁故歟是故身不必尊也要其心之厚於仁物不能  
俱使其盡性也要其仁之不忘於其心君子之於仁如是  
而已爾嗚呼古人吾不得而見之有若龍泉王先生者其  
不亦庶幾於此乎先生諱毅字剛叔別以木訥齋自號風  
致異稟篤志于學早從鄉君原善遊而聞聖賢求仁之方  
及登金華文懿公之門又得平理一分殊之旨所學粹然

一出於正教授里中戶外之履至無所容講解經義於天  
理人欲勝負消長之際尤極懇切感悟者咸泣下鄉邑化  
之皆薰爲良善人有善稱道之不置有不善引而教之納  
于無過之地乃止其鬪爭不能旨者不求旨于有司而取  
旨于先生之一言卒悔服而去會歲禋先生勸邑長發閭  
右之粟以給餓者全活以千萬計有患難疾苦來告必竭  
力營護而拯濟之斧鑕在前弗恤也蓋其飭躬勵志動以  
古人自擬其心常皇皇焉務推己以及人視凡物之失所  
若己不得辭其責者其風概節操雖古篤行之君子何以  
尙之至正甲午盜起旁縣良民被害甚先生領鄉兵往禦

之里井恃以爲安夫何遺孽未殄者陰設狡謀而先生竟不幸遇害矣嗚呼先生隱居約處非有當世之責也而忘已以爲人如此謂其爲志于仁非歟或者以出處譬先生其亦淺淺知先生矣先生之心世固孰能明歟先生之沒門人胡君深旣勒兵討賊申復仇之大義而章君溢季君汶等奏聞欽賜所居蓋竹里爲創造旌賢祠復奏仍于本縣南尼姑寺巷重建嘉義忠祠與石抹叅政蕭公同祀則禮之以義起者也祠之建於庚子之歲屋宇規制完飭具美又欽撥祭田用其入爲歲時祭享之需祠之所宜有者靡不畢備焉于是章君乃以記屬于禱夫以先生畜德孚

道以化其鄉歿而獲祭于社固爲無愧而門人弟子尊其  
尊賢其賢以至謹于祠事其不足以矯末俗勸後世哉是  
用推述學行之槩刻諸珉石以詔來者其詳已見胡公翰  
所爲墓銘宋公濂所爲家傳茲不悉書

### 祭田規式引

夫祭祀有本有文敬爲其本粢盛牲醪器皿之屬皆其文  
也本不足固不可以祭文不備亦不可以祭所以古之祭  
者必有田無田則不祭非不祭蓋無共粢盛牲醪器皿故  
也剛叔王先生道明德立設教栢蒼以淑諸徒以善世  
俗薰陶善良者不知凡幾遺澤在人心沒世不忘古所謂



鄉先生歿則祀乎其鄉者門人章溢胡深奏聞立祠則有像不可以無祭有祭則有祀不可以無田故具奏以撥田有田則歲有所入所入有常數所用有常規故不可不取正於簿 所有規式咸書於左所有同志遵守勿失庶幾此田此祭永遠無窮也

建安陳宏愿書

撥田割付

明洪武勅理浙東道宣慰使司都元帥府分府切見故鄉王先生道明體用學究天人行前聖之淵源標後學之模範今既卽世門弟槩鄉曲俊彥已創造祠堂安

奉香火若不量撥田租爲祭祀之用匪特不足爲多士之勸抑且不能發潛德之幽光爲此公議七十一十二十六二十二等都田租各處一百碩撥入本祠以光祭祀合將備細田段開詳仰依數收租辦祭春秋祀事毋致曠廢所有割付須議出給者田段具此實撥春秋致祭田六百碩元帥胡深押

嘉義忠南隅尼姑菴忠賢祠割付

明洪武勅理江南等處行中書省據左司員外郎胡深呈開到各項便宜事理呈乞鈞詳數內龍泉縣故鄉先生王剛叔博學明道德行著聞士民敬仰已曾創建

祠堂撥到田租致祭不闕今次石抹叅政死於忠義如  
蒙准許合祠致祭庶幾激勵德行忠義之風得此本年  
十一月二十一日稟奉 省堂鈞旨儒士王剛叔布衣  
勵行守素不羣時爲鄉黨敬仰石抹叅政世祿南安大  
兵恢復浙東本官喪敗之餘復集殘戈死于行伍跡其  
死生之始終可見人臣之氣節合准所呈劄付南安府  
聽從士民合祠祀祭優免二戶雜役仍給榜發下龍泉  
縣旌異施行奉此省府除外合行出榜曉諭依此施行  
所有榜文須議出給者

右榜仰處州路總管府准此

本縣旌表優免榜

處州路龍泉知縣張嘗謂旌表忠貞既有資於政體遵  
崇道德實乃啟于化原切見本縣前齋鄉先生王公  
志述聖賢學該今古慎獨得修身之要隱居存愛物之  
誠故身沒而學益彰道存而名不朽石抹叅政以義捐  
生以身殉國不失人臣之節可勵薄夫之敦明奉省  
府松文旌異聽從士民合祠祀祭優免二戶雜役除遵  
奉外現設各處祠堂擬合禁約諸邑人等不許入祠攪  
擾之人仰指實告官痛治所有榜文須出給者

右榜諭衆通知

義忠祠祭文

青田劉基

維公祖述河汾闡教括蒼育材善俗道德彌光烈烈蕭君  
同植綱常遐在人心沒世不忘聿崇其祠遺像堂堂肅將  
誠意祀事孔彰牲醑豐潔乘盛苾芳來格來歆降福無疆

祝板文

祖命工祝承致多福賚爾子孫受祿於天使爾子孫宜稼  
于田稱壽永年以受嘏福戰兢守持弗替引之

從學祭文

維某年某月某日從學諸生

元守石抹叅政萬戶

蕭中之

宜孫

王府叅軍 謚縉雲伯

胡深 仲淵

御史中丞兼太子贊善大夫

章濫 三益

洪都知府中順大夫

集深 景淵

湖廣岳州巴陵縣主簿

葉世傑 子奇

處州翼元帥府指揮同知

季汶 彥文

處州元帥府萬戶

季喜 彌章

工部主事朝請大夫

鮑如石 太初

刑部主事

季宗英 仲雱

承天門觀察使

胡樞 伯機

殿前宣撫事使

章存誠 允明

處州衛指揮僉事宣武將軍

胡楨伯棠

溫州平陽衛左指揮同知懷遠將軍

章存道

觀察使

胡子厚養素

湖廣荊州遼王府教授

徐明善

處州都元帥府指揮使

沈櫟

山西大同中屯衛指揮同知

徐方

處州翼元帥府指揮同知元帥

王承

四川建昌府行都司指揮僉事

徐政均可

湖廣楚王府大阜庫副使

季皴德剛

西崖郡轉運鹽使司僉事

王輅存中

温州平陽衛鎮撫使

劉輝 德光

温州翼元帥府萬戶

林以善

南京親軍萬戶

劉九龍 永年

南京千戶所鎮撫中顯校尉

葉仁 人傑

貴州都司衛千戶

徐允

從軍醫學太丞

張道生 敬立

湖廣長沙府同知

何熙 彥敬

南置隸御史

張思永 允修

御史

張德明

湖廣襄陽府忻州郇水知縣

季均政 德容



南員隸平陽府定遠縣縣丞

王文玉

梅英

福建福州府羅源縣主簿

何璿

深

金臺畫士

王夢麟

處州路總管

張保

前郡馬

王選

逸民

章存質

陳允中

章存仁

何桂

章渝

張道行

張叅

趙宜惠

俞德

趙憲

高昌

張麗

等謹備牲醴偕孝子王彥珣詣龍泉怪竹鄉致祭於  
木訥齋先生王公之靈曰嗚呼天之所以爲人者惟道而  
已人之所以得乎天者惟心耳惟吾先生學貫天人  
道備一已誠後學之仰止也載瞻先生巍巍乎泰山  
之不可升熙熙乎春風之滿庭非獨關斯文之盛衰抑  
亦爲有國之重輕嗚呼天豈不仁致世道之不寧也耶  
機槍騰芒泰堦不平狻猊作沴狡兔猙獰戕我哲人毒  
我羣氓又安得不疾首而痛心耶天道好還否極泰亨  
妖狐已殪狡兔受烹餘氛遠屏康衢必行雖衆忿之少

舒終難起 先生於九冥嗚呼何諸生之不幸如斯其甚耶倘假以天年得漸漬之陶成庶少全諸生之令名寧不爲有國者之滿散也嗚呼寒心如冰痛心如刑竊蒼天而告哀瀆 先生之至靈尙饗

門人陳允中撰文

公祭文

維年月日同郡士民謹以香楮庶饌之儀致祭于

元故處士 諱毅字剛叔號木訥齋王先生之靈曰嗚呼志

士仁人殺身成名我公賦性君子肫肫敷道恬養十餘春執經務學莫知幾人考亭風月爲之一新

世事異在壬辰郡邑羅毒遭此紅巾我公崛起國  
鄉民此賊亦除和樂邦郡上命施恩減免二分貧者  
以樂富者以嘆何期今日青冠紛紜復興前舉又苦蒸  
民狼子野心虧害公身我公受辱甘殉世塵夫何  
怨哉公私莫伸申奏雪恥惟藉聖君歸去來分時屈季  
冬聊申薄奠少效寸芹公忠無私不勞其神使其見利  
而忘義求生害人者亦將有感于斯文哀哉尙饗

從學祭墓文

維年月

日受業門人

章濫  
胡深

等敢昭告於

元故師臺木訥齋王老夫子之墓曰嗚呼先生積學修

身五十餘年胸襟澄澹冰壺玉淵道行甘棠高山大川  
薄夫以敦貪夫以廉天喪斯文梁木其顛齋志不伸所  
知在天哀悼莫起慟徹九泉宿草埋魂日月變遷數  
薄莫鑒此情虔嗚呼痛哉伏惟 尙饗

維 大明洪武四年歲在辛亥三月乙酉朔越有二日  
丙戌從學門生懷遠將軍平陽衛指揮使司同知章存  
道謹以潔牲柔毛致祭於 先師木訥齋先生王文公  
之靈嗚呼民生於三事之如一嗟 小子以服勞王事  
之餘獲遂乎哀經歸葬之志皆 先生之遺教也思  
先生之祠底幾愀然如有見于 先生者乎尙饗

維 大明成化十九年歲舍己卯七月十五日乙巳吉  
後學鄉生光祿寺署丞永康章嵩謹以牲醴致祭於  
木納齋王先生之祠曰嗚呼先生以豪傑之才淵源之  
學啟迪後進皆能振作我祖中丞公而輔佐 明太祖  
削平禍亂奄有萬方而成莫大之功皆 先生教育之  
所致也茲 嵩 奉 命得往龍泉展拜吾祖之坵隴以盡  
追遠之誠而 先生之墓相去不遠謹備牲醴謁祠以  
表寸忱惟靈鑒之尙饗

跋木訥齋集後

龍泉怪竹鄉先生王剛叔所著木訥齋文集其時門人已

行梓矣後得厥孫再梓今仍淪于蠹魚不可不爲之重新  
于梨棗雖然 先生事蹟備詳茲集見茲集如見 先生  
家傳有宋太史之筆墓誌有胡先生之銘祠記有王學士  
之文而 先生遺像則家慶圖焉爰命工人稍爲修葺付  
七世孫子寶輦以歸工訖請予記歲月俾勿忘焉嗚呼  
先生往矣名章猶存與日月爭光寧非鬼神呵護也耶  
明嘉靖二十四年秋七月五日浙東劍川守後學零陸陳  
東從震甫書

重梓木訥齋文集誌

至正訥齋王先生文集門人殿前宣撫使允明章存誠已

爲授之於梓藏板于桂山書院明初灰於燹火煨燼百有  
餘年弘治十三年春祠下優老元孫王文奎應邑宴享鄉  
賓之招遂執乃祖所遺文集稿爲贊沐 邑宰梅秀公贊  
裏重繡梓焉卽令子怡和捐資鋟鐫誠乃祖在天之靈爲  
之默相必使此稿峙不朽于人間不致終淪没于烟草也  
幸何大哉

木訥公集記後

嗟乎予賦命不辰疊遭顛沛而得不死以成家業者皆賴  
吾祖之德庇也嘗讀吾祖廟祝惟願子若孫修德以紹先  
型予雖不克奮拔然自反無愧聊可以對天地而質鬼神



第吾祖之功被於當世而德及於後人其載之志乘者班  
班可考都人士每謁祠瞻仰未嘗不爲之肅然起敬流連  
而弗忍去今堂廡聿新已可妥先靈之幽爽獨譜牒乃世  
系之所存文章尤德業之所寄兵燹後散逸殊多日繫於  
懷未遑剗刷奈今墓祭歸來病臥不起嗟乎予年七十又  
三矣雖有室有家向平之願已畢然精神日敝危若朝露  
凡一切身外物久已視同棄屣惟茲譜牒文章負疚而不  
能一刻以自安也痛哉痛哉挑燈力疾滴淚濡毫以告我  
後會須仰承夙志以綿遠吾祖之功德則予於九泉之下  
庶可贖罪於萬一諸子其勗之

康熙四十七年三月寒食後二日十一世裔孫應瑞謹書

於木訥公集後

吾祖 木訥公文集明初門弟輯於散佚編校五卷凡明  
世鏤板者三

國初又經燹火曾王父敬先公僅守殘篇大父太初公懇  
懇切切攷志乘暨前賢集出以裒附焉雍正辛亥冬家君  
介石公躬寓杭糾梓越壬子成之謂庶可光先德者也集  
板寄杭宗冶山先生家不幸更罹王父憂聞音馳歸哀慰  
病痴厥後集板無有問者嗟乎吾祖之功德應並峙劍川  
豈終湮沒于世耶乾隆庚辰冬幸

關中德水先生蘓公來宰斯邑於旣治之明年索取存稿  
贊襄繡梓此可見吾祖德業文章能興後賢之企慕者矣  
蘓公之治龍也惠民興學之事無一不備彰彰邑史而於  
嘉言懿行可風世者尤致意焉嗚呼吾祖昌明正學四百  
餘年復光於宇宙者固吾祖在天之靈而亦 蘓公之克  
昭厥美也吾祖之文傳吾祖之人傳而 蘓公亦並傳不  
朽矣敬紀其要以俾不忘云時

乾隆二十九年甲申律中姑洗十四世孫

維基

薰沐謹識

清朝裔孫

應瑞 敬先

先一 太利

豐 鳳都

繼聖 集成

先丙 如煥

豫 介石

先丁 文輝

孚 以誠

熹 在中

履 考祥

謨 培金

詔 西友

續十三世孫

澤 咸 頤 益 謙 震 恒 萃

續十四世孫

維賢 維基 維年 維志

續十五世孫

木訥齋文集附錄